

其生畚田者爲山禾亦曰山旱不俟水種藉火之  
養雨露之滋粒大而甘滑所謂雲子亦曰山子也  
旱稻獮人多種於山近民亦多效之蒼梧岑溪又  
有雪種十月種二月穫卽一歲三田冬種春熟也  
黍稷之屬有赤梁有白梁有青梁有黃梁梁粟也  
嶺表少黍稷呂氏春秋云飯之美者南海之秬秬  
黑黍也梧近南海而秬黍鮮知其名亦不知稷之  
爲粟但以梁稱之俗名稷曰明禾有高粱多生瘠  
土莖不高而葉稀穗小又有穄似黍而穗異生三  
四枝若手指然以耐旱故高亢之地種之